



Mikivusuk Thomassen
Inuit Ataqtigiit sinnerlugit Inatsisartunut ilaasortaq

§ 37 naapertorlugu apeqqummut 258/2018-imut akissuteqaat

12-10-2018
Suliap nr. 2018 - 19974
Allagaatit nr. 8906058

1. **Danmarkimi peqqissartut illuannut ineqarneranut nerisaqarnerannullu suliaq Naalakkersuisup aasaq Danmarkimi angalanerminut peqqutigisaa sumut killippa?**

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@nanog.gl
www.naalakkersuisut.gl

Akissuteqaat:

Kalaallit peqqissartut illuat (KPI) pillugu suliap kingorna peqqissartut qanigisaasullu arlaleriarlunga oqaloqatigisarnikuuakka. Oqaloqatigiittarnerup maanna ilaatigut kinguneraa maannakkorpiaq sulisut, peqqissartut qanigisaasullu akornanni attaveqatigiinnermik oqaloqatigiittarnermullu pitsaanerumumik pilersitsiniarluni suliaqartoqarnera. Tamatuma saniatigut KPI-p suliaraa peqqissartunut qanigisaasunullu paasissutissiissutit nutarterneri pitsanngorsarnerilu, tamanna ilaatigut peqqissartinneq pillugu quppersakkanik nutaanik suliaqarnikkut.

2. **Kalaallit peqqissartut ineqarnerminni ilaqaasunik ingjallorteqaraangamik suliaritinnialeraangami ingjallortaasoq kalaallit peqqissartut najugaqarfianniit anisariaqartarnerat qaqugu qanorlu aqqiviginiarneqassava?**

Akissuteqaat:

Aallarniutigalugu eqqaasinnaavara qujanartumik qaqutigorujussuaq qanigisaasut KPI-niit nuuttariaqartarmata. 2017-imi qanigisaasut 29 napparsimasunik unitsitsineq il.il. pissutigalugit nuuttariaqarsimapput. Tamatumani 2017-imi katillugit ingjallortit 6.993-eriarlutik unnuisarsimanagerat aamma eqqarsaatigineqassaaq. Tamatumunnga atatillugu KPI-p isiginiartuaannarpaa peqqissariartut ingjallortaata qanoq iliuseqarfigineqarsinnaanersut, kisianni KPI-p pingaarnepaatut suliassaraa peqqissariartut sullinnissai kiisalu peqqissartunut katsorsarneqartunut inissamik qulakkeerinninnissaq.

Ingjallortit KPI-mi akiliillutik ineqartarnerannut aqqiissut pillugu Inatsisartut aalajangiiffigisassaattut siunnersuut UPA16-imi imm. 122 pillugu Ilaqtariinnermut Peqqissutsimullu Ataatsimiititaliap isumaliutersuutaani aalajangiunneqarpoq, qanigisaasunut killilimmik ineqartitsisoqarsinnaasoq pingaarnepaasorlu tassaasoq, katsorsartinnerup nalaani peqqissariartut inissaqartarnissaat. Taamaattumik 2016-imili ersarereerpoq, KPI-mi inissat killeqartut.

Sinaakkutiit, isumalluutiit aningaasaqarnerlu periutsimik maanna atuuttumik

allannguissamat periarfissiingillat. Ilaqutaasoq ingiallortaasoq peqqissartut illuanni aalajangersimasumik ineqarnissamik neqeroorfigineqassappat aningaasaqarnikkut sulisoqarnikkullu sinaakkutit annertusineqaraluarpataluunniit peqqissartut illuat allilerneqartariaqassaaq.

2016-imili Ilaqutariinnermut Peqqissutsimullu Ataatsimiititaliap nassuerutigereepaa.

3. Naalakkersuisut aasaq peqqissartunit naammangittaalliummik tigusaqarput, Naalakkersuisullu Danmarkimut angalareernerata kingorna naammangittaalliummik suliaqartut oqaloqatigineqaaqqissimappat?

Akissuteqaat:

Allakkamik maalaarummik 29. maj 2018-imik ullulerneqarsimasumik tiguserup kingunitsianngua allakkamik akissuteqaammik nassiussisoqarpoq, tamatumani allakkami taakkartorneqartut akissuteqarfigaakka. Tamatuma kingorna qarasaasiakkut ataatsimiinnermik malitseqartitsinermi peqataavunga, tassani taakkartorneqartut assigiinngitsut toqqaannartumik eqqartornissaannut periarfissiisoqarpoq. Allakkatigut akissuteqaammik qarasaasiakkullu ataatsimiinnermik malittarinnitsitsissutitut ulloq 30. juli 2018 napparsimasut Kalaallit Peqqissartut Illuanniittut (KPI) ataatsimeeqatigaakka, tamatumani allakkami maalaarutaasuni taakkartorneqartut arlallit eqqartorneqarlutik. Napparsimasut qanigisaasullu ajornartorsiutitut unamminiarnartutullu taakkartugaat KPI-mi ataatsimiinnermit ersersinneqarluarput.

4. Naalakkersuisut kalaallit peqqissartut illuannut tunngatillugu sullissinerup aqutsinerullu tungaatigut qanoq pitsanngorsaaniarpat? Nutaamilu tassunga tunngasumik suliniutit suuppat?

Akissuteqaat:

Pingaaruteqarpoq erseqqissassallugu peqqissartut illuanni aqutsisut tapersersorlugillu tatigigakkit, aamma aqutsisut sulisullu napparsimasut qanigisaasullu pillugit sulilluartarmata.

Siunissami qaninnerpaami Københavnimi Kalaallit Illuanni innuttaasunik ataatsimiisitsinissara kissaatigaara. Tamanna Kalaallit Illuata Kalaallillu Peqqissartut Illuata akornanni ataatsimut aqqissuussinerussaaq, tassani peqqissartut illuannut kajumissutsimik pulaartartussanik amerlanerusunik peqalernissaaq ilaatigut siunertaassalluni.

Kræftimik nappaatillit peqqissartut illuanniittut katsorsarneqarnermik nalaanni piginnaanngorsaqqinnissaannut periarfissat misissussavakka.

Tamatuma saniatigut apeqqummut 1-imut akissuteqaat takuuk.

Inussiarnersumik inuulluaqqusillunga


Doris J. Jensen